

東甌金石志

東甌金石志卷十

嘉善 戴咸弼

瑞安 孫詒讓

元一

玉連赤不花龍鼻洞題名

至元己丑暮秋

三日奉

印給事相公玉

連赤不花偕牧

守總管李朶兒

宜玉章

右在樂清雁山龍鼻洞左壁六行四行行六字二

行行三字正書徑五寸三分府志有同知温州路
總管府事李朶兒赤此無赤字末行三字當有關
文萬姓統譜有元宜桂可湘潭人博通經史則此
宜玉章或卽人姓名也

汪大有壙誌

文林郎太學博士汪公壙志

先君姓汪氏諱大有字中父曾祖昌祖伯達父浩迪
功郎一世祖由閩徙溫之固妙越六世至迪功郎地
理諏葬親兆于龔珏得汪灣之西識賢遷廼卜築于
在城狀元坊迪功娶葉氏封宜人生學錄伯氏山父
次生先君俱從陸維國先生游爲書學巨擘竹坡韓
君分教吾邦奇而友之號曰二汪先君以癸丑補上

庠會同舍言忤奸全時亦與議見幾而作聯丁艱棘以
服闋入參選考口最咸涸龍飛登乙科初筮從仕郎
慶元府觀察推官四明邸第權豪小官咸俛仰之先
君涖治燭史戶之誣盜斥兩國謝氏之脅佃觀文史
公服其直口口畫曰公明以荐于朝既而蒙川劉公
本齋陳公代分鄞閩留辟幹官時海寇交結表裏奪
攘先君根刷篙戶賊幟隨戢轉文林郎除國子錄行
太學博士不就迺旋祖屋營別墅自號梅邊居士丙
子冬仲岷麓家公下鄉城則堂憲澍東時曾舉先君
爲十五士之首岷麓用有舊藉以遠官卒莫逃乎數
丁丑十一月二十五日也嗚呼尙忍言哉先君生于
甲戌十一月三日享年六十有四妣包氏先半年卒

東園金石記 卷之一
男四人長瑞次壽繼亡次福亂離莫稽所從女三人
長適明經戴氏次適白石蔣氏次適黃塘夏氏孫男
二鄞馨孫女一彩不孝男崇疆承速貧之餘不克襄
大事忍死卜以己丑十二月庚寅合葬于故里之西
岡從先志也姑敘梗概納諸壙學生前奉議郎朱棡
填諱

謝思澤案永嘉四十一都東漿奧地中初不知
有古壙也術者謂是處可卜兆咸豐間或掘之得
石砌又掘得此誌兩石相合剖之金書燦然如新
字徑四五分不等筆意雋永有晉人風範

孫詒讓案汪大有咸淳戊辰進士萬厯温州府志
選舉門以爲瑞安人据此誌則大有一世祖由閩

徙溫之固妙

固妙在永嘉清通鄉四十一都宋時舊名今名古廟卽其地也

至其

父浩又徙郡城蓋雖貫瑞安實居永嘉也誌載大有癸丑補上庠會同舍忤奸全時亦與議見幾而作此指寶祐四年太學生劉黻陳宜中黃鑄林則祖曾唯陳宗等上書攻丁大全劉黻等六人並拘管江西湖南州軍事見宋史丁大全劉黻陳宜中等傳時大有正在太學蓋亦與聞其議及黻等得罪而大有亦出學也又敘其爲慶元府觀察推官蒙川劉公本齋陳公代分鄞閩留辟幹官蒙川劉公卽黻咸淳四年以集英殿脩撰知慶元府兼沿海制置使詳前卷龍鼻洞題名下代黻者爲本齋陳公檢宋史及雍正浙江通志均無其人今不可

攷誌又云丙子冬仲岷麓家公下鄉城則堂憲浙東時曾舉爲十五士之首岷麓用有舊藉以達官卒莫逃乎數云云丙子爲端宗景炎元年岷麓家公蓋卽家之柄萬厯府志遺事門引全甌事略載是年十一月元兵犯郡城李珏與秀王與樸棄城遁參議官徐似孫與參謀官家之柄以城降元以之柄爲安撫似孫副之卽此所謂下鄉城也則堂卽家鉉翁自號宋史本傳載鉉翁嘗爲浙東提點刑獄卽此所謂憲浙東也之柄蓋鉉翁族人鉉翁薦大有時之柄或在幕中故得與有舊萬厯府志秩官門載元初署學事者以大有爲首諦繹誌語蓋之柄以降元得官卽俾大有攝學官至次年丁

丑冬卒死於兵可見宋元易代時兵亂之酷惟署郡學事不當云達官疑石本晦蝕錄者誤釋也誌又載大有四子瑞壽先亡福觀兵亂不知所在惟季子崇疆僅存至元世祖至元二十六年己丑始葬大有於故里而誌其壙時距大有之死已十二年矣

李永孫壙誌

李氏出隴西支裔益蕃以衆有族於閩者其稱蓋久先君之十二世祖諱岑由閩徙溫居楠溪之蒼墩四世祖舒州太守諱巽始遷於利仁里舒州一子諱伯鎬爲南康軍司戶參軍司戶有子八人先君之祖怡堂翁諱居仁於倫次爲四監衢州常山稅務呂卒怡

堂有子二人其季處士諱叔彥夙嬰惑疾不仕處士
實生三子先君其仲也先君諱永孫字公訓生涪祐
戊申二月辛丑少爲良子弟長爲賢父兄家世習儒
雖不以一藝自名而文翰過人遠甚天性孝友事祖
妣孫氏至死葬祭無一不中於禮侍處士與妣孫氏
溫清惟勤處兄弟無閒言待人不爲崖岸斬絕之行
遇鄉閭有急輒□□之不吝金穀費由是聲名益彰
衆咸稱爲長者先君容貌魁偉端重平居不妄喜愠
唯肯節會集爲賓朋兄弟子姪盡情極權甲申歲元
夕長幼聚宴酒半忽得痺疾執因母周氏手欲有所
言而不能言次日索楮筆復不能書竟以是月十九
日戊辰長逝年三十有七聞者莫不流涕嗚呼痛哉

娶同里鄭氏男三人屋堂塾塾爲叔父後庚

寅歲四

月癸卯諸孤忍死奉匱葬于邑之西廬山未果乞銘

□□□姑叙其槩納諸壙孤子屋泣血謹識姻末前

承議郎帶□□□文思院通判慶元軍府事王漢老

填諱

右永嘉李永孫壙誌在相溪亦謝文波手拓本高

廣約一尺餘十七行行二十四字行楷書誌中執

因母周氏手疑當作因執書丹時誤移其次也

孫詒讓案李永孫舊府縣志無攷此誌所叙世系

極詳首載其十二世祖岑由閩徙溫居相溪之蒼

墩攷葉水心集李伯鈞墓誌亦云由永嘉汎枝港

盡汝而至相溪其中洲四絕水陂匯深緩草樹多

細色微爽宜遠望舊名蒼墩溪之深厚處也其十
世曰岑號蒼墩先生與此誌正合岑於永孫爲十
二世祖則永孫於伯鈞蓋從孫行也誌又云四世
祖舒州太守異始遷於利仁里異紹興辛未進士
亦見宋朱弼墓誌末又題姻末前承議郎常□□
□文思院通判慶元軍府事王漢老填諱漢老王
忠敏允初之孫吏部郎致遠之子倅明州宋亡杜
門不出見萬厯府志人物傳此結銜又有文思院
三字攷宋史職官志文思院隸工部提轄官一員
此上有缺文不知爲提轄爲監官也

館頭石佛塔題款

温州路樂清縣長安

鄉長林塘下浦北保

居住奉 三寶弟子

南文喜建立石

佛寶塔一座拔濟幽

靈超登覺海是文喜

父母劬勞仗

佛洪慈成就善果

至元壬辰季冬吉日

南文喜謹題

傳傳按右石佛塔在樂清館頭江滸巖上共三層
上一層結頂已傾圯中一層四面刻經四菩薩刻佛
像塔不甚高中有石佛一尊而不題款在佛首後

東陽金石志卷之十一
向南計十行共七十五字正書徑一寸五分惟文
喜二字較小郡邑志長安鄉在縣南舊名章安鄉
長林塘下浦北保今其地有鹽場卽翁洋鹽司管
轄之地至元壬辰元世祖二十九年也

白鶴寺經幢

大佛頂靈驗尊勝陀羅尼

文不錄

昔至元甲午歲□月□三日奉

南無阿彌陀佛

三寶信士□祥同妻王氏三娘建

右在樂清白鶴寺高二尺四寸三分闊七寸六面
五面刻經文面凡五行行廿一字正書徑九分款
字在南面佛號字徑三寸八分

項公澈墓誌銘

故通守朝散項公墓誌銘

篆額

故通守朝散項公墓誌

□

眷弟清河張公輔撰

□珂敬書

眷□清河張寶篆蓋

公項氏諱公澈字德澄其先雪川人五季時徙安固

之南隄衣冠詩禮

世為著姓曾大父康故迪功郎大

父競辰贈中奉大夫父模弱冠奮儒科冰蘖自持所

至以項佛稱終中奉大夫著□□□□德府贈通

議大夫妣任氏吳氏贈碩人公以父任補官□□□

薦俱為首選歷崇安簿福建倉幹治司檢□□□□

□□□ 場改秩知寧 德縣通判汀州吉州積階朝散

郎公性□明敏文詞精妙初任崇安安晚鄭公猶子

次申以守將潛時□□者羅致之嘗檄公入幙公

力辭未幾鄭果墨敗累及其僚人始服公先見息菴

湯公檄攝松溪荆邑收觀逾年入郡幙書謨贊助事

無滯流會大水諸司委公賑荒獨力拯治堙死餉餓

全活近萬家建人德之憲使石壁胡公素方嚴行部

眠幙下無當意者大器公才美俾隨司謙清犴事多

所平反諸司交薦而倉使耐軒范公力以幹官辟有

旨特授寧德積十二政傷錦之後疏理寔難公持一

廉與百廢庭無撓政村無詬租帥陽巖洪公嘆曰安

得人人如項寧德秩滿士民多詣府借留者以千數

臨汀缺守都堂剖公攝事郡接海潮出沒峒獠前失

撫馴遂致披猖公恩威兼濟峒長至相率拜下廷作

侏僂語謝云迄不犯境先是郡多剽寇捕獲者必得

請憲司乃寘于理中道路格申牘至不能制公鑑往

弊一翦之寇始衰弭汀人曰吾人眠已貼席矣設像

祝佛以報修學舍增學畬適意造士文風大振程縣

賦必寬期限不苛督也遇僚屬必勸廉勤不苛察也

越二考受代而歸時宰將以朝蹟啓擬公素恥奔競

竟拜廬陵之命易代後敷門守默世故不獲挂口水

莊山菴布裘草履夷然自樂取顏子如愚之義自號

希愚有詩文四卷雜著四卷晚尤嗜史手編諸家評

論附以已見名曰纂要昕夕研覃至病不痊悲夫公

生于宋嘉定辛巳十月己未卒于大德戊戌九月庚

子享年七十有八娶吳氏繼陳氏先卒贈安人子男

五人光祖前朝政郎長樂主簿先二十三年卒則祖

通仕郎饒祖繼峯學士後昭祖爲無欲知縣後陞

祖前將仕郎女四人出適孫國逢原陳錫孫公

采其壻也孫男五人願之師之蒙之履之苦之女八

人長適葉均次適林坦之餘幼將以是歲十二月庚

申奉襄事葬于集善鄉曹興之原二孤請銘余與公

有連昔仕閩備知本末誼不獲辭因論次出處而有

感景炎末迹其類公歸里落職者速仕然浮名一瞬

桑海遽變所謂者舊無有害千百一二耳

大元垂統有蹈公宦軌觀北者留中然脩途萬里風

士非宜所

謂富貴歸故鄉絕無僅有者蓋公精識造

微定力不撓流行坎止悉安其天有

邴曼容陶元亮

之風焉白髮蒼顏優游卒歲歸然先輩之典刑後進

之矩則也嗚呼全矣

銘曰

公襲蓬山

之嫡傳兮

其美世濟官于都水閩浙兮表

表壯歲亦既宰百里之雄劇受專城

之寄事上以忠

勤兮接下以恕羌乾旋而坤轉兮

曾靡其胸中之所

茹林密兮山深一修兮二季振振兮盈

庭飄飄兮遺

世老壺中之日

月

兮寤槐安

之夢

寢歿無憾于重泉

兮生有五福之胥備揭余銘于茲阡兮以諗來裔

孫詒讓案右宋通判項公澈墓誌在瑞安二十四

都曹與墓已蕪沒碑腰斜斷爲三失其中段其上

段雖尙存字亦多漫滅惟下段略可讀光緒庚辰秋余始訪得之精拓數紙復以南隄項氏譜中所錄全文校讀一過始略得其大概原碑凡二十二行自首四行外每行並四十九字銘三行低四字書行四十一字殘缺處以錄本補之然錄本亦尙有缺誤又所補之字以石本所缺字數覈之或羨或不足亦閒有不合則更無完拓可以勘正矣項氏爲瑞安巨族自宋迄今千餘年猶蕃盛不替公澈舊府縣志無傳据誌蓋在宋時官至吉州通判值宋亡入元遂潔身不仕蓋能不墜其家聲者其父模開禧乙丑進士見嘉靖瑞安縣志選舉門載其官爲祕書大著攷中興館閣續錄項模字子範

淳祐四年八月以國子博士兼景獻府教授除祕
書郎八年十一月以提舉台州崇道觀除著作佐
郎十一月除著作郎大著卽著作郎也此誌敘模
官秩文適當石缺處錄本亦僅存一著字下缺五
字又有德府二字似模又嘗出爲州郡官矣誌敘
公澈爲崇安簿時事云安晚鄭公猶子次申以守
將漕檄公入幙公力辭未幾鄭果墨敗安晚爲鄭
清之別號攷宋史清之傳不載其從子次申將閩
漕事惟福建通志宋運判有鄭次申鄞縣人嘉定
十年進士又知建寧府亦有次申名並淳祐閒任
卽其人也誌又云帥陽巖洪公以榦官辟宋史洪
天錫傳載其由知漳州改福建安撫使又著有陽

巖文集則陽巖洪公卽天錫也至所云倉使耐軒
范公疑卽范午之亦見福建通志宋提舉常平題
名誌又載公澈子昭祖爲無欲知縣後無欲知縣
名公悅終知侯官縣有惠政見萬厯府志宦業傳
誌爲張公輔所譔張寶篆蓋書者名珂其姓在缺
字內無從覈補也公輔與寶亦無攷

宋與石盆題字

大德辛丑結制日題古魏里李廣昭製造開山廣順
廣因廣永

孫詒讓案右石盆在瑞安二十都宋與山五通殿
前盆圓徑一尺八寸有奇內鏤八卦及華紋絕工
題字於盆口迴環刻之相傳其地舊有僧寺此盆

卽寺中物故末有開山僧名然竟不知其何用也
佛書以四月十五爲結制日亦見後重脩仙巖塔
記

柯謙重建郡學碑

温州路重建廟學記

溫州路重建廟學記

承事郎江浙等處儒學提舉柯謙撰并書
中奉大夫江浙等處行中書省參知政事李
朶兒赤篆蓋

昔謝康樂守東嘉招學講經則自司馬渡江有學舊
矣厥後沿革廢興以時宋天禧己未改建于九星宮
故基卽今址也治平乙巳紹興庚申兩延于災其重

新也必增美焉嘉熙甲戌徧葺之尤麗水心葉文定公爲記

皇元混一至元丙子冬郡灾唯學獨存延祐改元八月又灾乃燬及之時學帑赤立多士軫憂總管忽辛公初視事與同知朶帶公慨然曰政無急此一志畢力悉以養士租爲度材鳩工費不給則量儒人力助之而郡寮又無不協相者是年十一月大成殿成會總管奉檄經界江東同知獨任其事四越月總管還治喜曰微同知力不及此於是廊廡殿門講堂齋序庖廩爲屋百有四楹櫺星門三南爲亭二繚以周垣百廢具興又植松檜竹石前後映帶以爲章逢藏脩遊息之地是役也經歷孫德裕府史王偉儒生曹錫

陳杞周習甫服勤程督皆能殫力承意以相之分憲
按視至喜且趣丹腹之未備者宏規偉觀視昔有加
矣旣而監郡脫帖木兒公至任而朶帶公書滿于四
年之夏同知禿孛歹公來代詣學顧瞻輪奐與監郡
咸嘆曰是知急先務矣不可以無紀文學掾孔文定
章頃前後一詞來請記余乃爲之言曰嗟夫人力之
有功於學棟宇可新也人心之罔功於學習俗有未
新爾東嘉學校士自昔文風爲兩浙最當以時文進
取雕刻綺麗惟以悅主司釣科名爲務水心所謂兢
省以禦物欲彌綸以通世變者自其身而推之天下
者未免以逐末忘本事外忘內壞之今庠序復新於
人力矣洗人心而一新緊誰力乎克己工夫是斷是

斷也切磋問辨度薨薨築登登也下學而上達升堂而入室百堵興廟奕奕也其用力之方在已而已由人乎哉夫當延祐改元奉

明詔以德行舉人以經術試藝詞章次之浮華所不取倚歟盛哉此作新人心一大幸會也乃庠序之新亦在是年天時人事得非有數存耶東嘉士其欽承天子明命惟新是圖則學之有功於人又大矣中議大夫温州路總管府達魯花赤兼管內勸農事脫帖木兒奉訓大夫同知温州路總管府事禿孛歹朝列大夫温州路總管府治中楊彥祥承信校尉温州路總管府判官薩的彌識承直郎温州路總管府推官趙計承直郎温州路總管府推官蔡汝霖承務郎溫

州路總管府經歷孫德裕將仕郎温州路總管府知
事陳天祺將仕佐郎温州路總管府提控案牘兼照
磨承發架閣王孝本温州路儒學學正章墳學錄林
斐監造敦武校尉温州路錄事司達魯花赤忙古歹
延祐四年 月 日照信校尉温州路永嘉縣尹
兼勸農事何玉從仕郎温州錄事沈圭立石督□□
□□教授劉景淵 督修學職戴可大王與□
陳潛國永椿
末兩行自學正字起有改刻之文蓋其上錄之
如左

儒學正章大澤學錄林斐監造敦武校尉温州路錄
事司達魯花赤忙古歹從仕郎錄事沈圭延祐五年
仲春亞中大夫温州路總管兼管內勸農事趙鳳儀

立石府史金悅温州路儒學教授劉景淵

右碑在府學大成門外左側高九尺九寸二分寬五尺篆額字徑六寸文二十五行行四十五字行楷書徑一寸餘撰書者爲江浙等處儒學提舉柯謙篆蓋者爲江浙等處行中書省李朵兒赤曾爲温州總管見前至元己丑龍鼻洞題名篆法瘦硬深得李泰和筆意楷書秀逸有風致極似趙文敏温州路者元分天下爲十一行省二十三道每州皆爲路皆置達魯花赤以蒙古色目人爲之葉子奇草木子元路州縣各立長官曰達魯花赤掌印信以總一府一縣之治判署則用正官在府則總管在縣則縣尹達魯花赤猶華言荷包上壓口捺

子也亦猶古言總轄之比此碑所記各官姓名以萬厯府志秩官門校之大略相同惟同知朶帶志作朶解脫帖木兒志作脫帖木爾蓋譯音無定當以碑爲正學錄及樂清教諭並有周習甫教授有孔文定章墳而學正無章墳當據此碑補之孔文定又見平陽縣志薦舉門官南昌教授錄事司達魯花赤忙古歹志不載當是以錄事攝此官樂清達魯花赤有忙古解解歹音近又同知温州路總管府事有王忙古解當卽此人永嘉縣志元置錄事治城內而永嘉令止管城外茲有錄事沈圭志失載王偉曹錫陳杞戴可大王與□陳潛國永椿金悅諸人志並無攷文中所列銜名甚詳有官有

階並足資攷證後二行新舊兩刻筆畫重沓細審可辨其收刻補入者爲章大澤趙鳳儀金悅三人鳳儀汴人延祐四年守温州興創廟學延名師淑後進文教翕然見府志名宦傳然据鳳儀刻戴侗六書故序云延祐戊午予來領郡則其莅溫當在延祐五年碑立於延祐四年自不應有鳳儀名又考府志學校載延祐元年八月火十一月建大成殿櫺星門三年建明倫堂五年建養源堂鑿泮池又立稽古閣鑿一鏡池鳳儀養源堂記云余來永嘉領郡事學之講堂適成遂以明倫名之其後小堂三間扁以養源又稽古閣記云郡學稽古閣廢久余至郡之明年春議重建至秋落成據此則學

成之後趙公復有增修其功亦不小然於已刊之碑屢入已名趙公賢者宜不出此不可解也葉文定卽水心宋史葉適本傳謚忠定今水心祠額及墓碣皆稱文定不知何故及讀此記亦稱文定則相承已久不自今始矣或是宋史偶誤又考嘉定七年知州劉茂潛重修郡學水心爲記此碑云嘉熙甲戌乃嘉定之訛臨文失檢耳

孫詒讓案右延祐四年温州路修學記首題江浙儒學提舉柯謙撰并書攷顧嗣立元詩選癸集云謙字自牧號山齋天台人至元間江浙行省辟昌國州文學掾不就元貞初以翰林國史院檢閱官預修元世祖實錄轉江浙儒學副提舉至大初陞

東國金石記卷之六
從仕郎紹興路諸暨州判官延祐初陞承事郎饒
州路餘干州判官未上制授江浙儒學提舉六年
卒年六十九子九思以父廕厯官奎章閣學士院
鑒書博士此碑立於延祐五年亦以江浙提舉繫
銜與顧選小傳正合山齋爲丹邱之父雅擅文譽
此文亦謹嚴有法度書尤腴秀記稱宋嘉定間脩
學水心葉文定爲記今見水心集水心之謚宋史
本傳作忠定此作文定與史不同攷宋陳昉穎川
語小亦稱水心爲瑞安葉文定公昉與水心時代
相接此碑立於元初距宋亦尙不遠而皆作文定
則今本宋史爲傳寫之誤知無疑矣記末所書郡
縣官吏姓名極詳惟趙鳳儀字瑞卿見陳高不繫

舟漁集三友軒記萬厯府志治行有傳趙許字

甫西川人見所作王與欽恤集敘欽恤集今佚序見瑞安豐湖王

氏錄餘多不可攷

大成殿先師像石碣

鳳儀來牧三年儒人林垚出示其祖式之所藏摹本

宜聖像乃宋開禧乙丑典教嚴陵日於大成殿前

廟土所得古碑也德容之盛春溫秋肅與造化並他

本皆不及敬鐫于石置之甌頻至治初元二月甲子

亞中大夫溫州路總管兼管內勸農事趙鳳儀謹識

右在像下方計十三行行八字行楷書徑八分

萬厯丙戌春余自閩抵甌越明年秋日散步費宮

回翔

聖座陰見一碣久仆塵土扶而諦觀乃先師像也
余愀然肅然躬爲洗磨遡其自來甚異夫聖道如
日中天余獲慶逢真像敬爲修豎摹以廣傳俾人
人共睹意者東甌文運之一新歟謹跋庚寅秋望
訓導閩人盧性愚識

右在像右方計四行行二十九字楷書徑五分
萬厯辛丑春嚴陵余尙友教授甌庠見

先師像石碑一片在

聖座龕後且仆地起視前識乃嚴陵遺刻其來遠矣
與寮友陳宗典徐紹先趙大蔭鍾仁龍政請府修
黻宮因同邑四尹周部議剏臺暨碑以肅瞻仰謹
識

右在像左方計四行行三十字小楷書徑五分
右碣在大成殿 聖座後用方尺甄築小平臺約
高六尺許上作小龕深一尺陷置壁間蓋 先師
像也同治八年冬咸弼教授既庠越六年始見此
刻恭摹一紙審爲元總管趙鳳儀所鐫碣高三尺
六寸六分寬二尺六寸二分像劍佩左向拱立高
二尺四寸鳳儀有款識題於下方其左右兩旁乃
萬厯中盧性愚余尙友題跋皆本學校官自至治
辛酉迄今光緒乙亥五百五十有五年再起再仆
字跡完好如新非 聖人靈爽式憑有神物爲之
護持何以得此真希世寶也府志職官門明教授
有金尙友遂安人金乃余字之訛宜據此碑改正

陳宗典以下四人皆府訓導亦見郡志明史職官志儒學府教授一人訓導四人州學正一人訓導三人縣教諭一人訓導二人周部監波人官永嘉典史四尹之稱其亦猶之貳尹歟林式之上舍釋褐見郡志選舉不言其爲嚴州教官畧之也

孫詒讓案萬厯嚴州府志宋教授有林式之嘉泰二年任趙跋稱其劖土得碑事在開禧乙丑卽履任後三年也

太玉洞天古井題字

容

成

太

玉

洞

天

至治癸亥

菊月丙申

朱善敬立

莊嚴勝事

右六字在永嘉學教諭署內聚英堂之右以青石
六方甃成井闕每方一字正書陽文徑一尺許題
款十六字楷書在太字外面亦係陽文字徑二寸
郡縣志云華蓋山有容成洞道書謂天下第十八
洞天黃帝時容成子於此上昇因名容成太玉之

天勞宜齋甌江逸志云永嘉學署有一井甚古相傳仙子所開水甘美異凡井上刻容成太玉洞天六字書法遒古可愛舊傳王羲之筆案俗說又明不足據王光蘊容成太玉洞天道院記舊傳有青牛谷五粒松三生石惜蕪沒不可復得惟煉丹井尙存邑庠之後卽此孫雨人學博云井闕六字似與井無涉莊嚴勝事云云疑係容成道院之物按此井舊在學宮基內元時爲容成道院所侵明正德初復歸於學見李東陽奎光閣記道院之建在元時石刻亦爲元至治年所立故阮相國兩浙金石志附入元刻金石文內以爲元人所書差可徵信

東塔院鐘款

佛日長明

皇帝萬歲

右上層第一區計二行

師祖愚谷惠祥師增崇品位□俗□

支景祥妣林氏同成證覺

當山徒弟前秀峯禪寺住持比丘元實

助鈔參銳

當山徒弟前大雲教寺住持比丘元禧助

鈔伍銳 當山徒弟比丘如琪志明志興

志靜志禮 行者德全各助二十貫文

奉定乙丑臘月吉日謹題

右第四區計十行首二行模糊不錄

文林郎知樂清縣事嶺南吳國光捐奉助建

東塔院住釋廣契呈蒙道府捐銀四十兩
仍令募化本縣鄉宦士民捨財乃置銅鐘
永爲本院振響者當山住師僧方璣徒姪
道信道祚道印徒孫海昇秉成勝事謹立
東隅塔橋信士周汝楫偕妻王氏同男孫
周允則捨銀壹拾兩助建置鐘福有所歸
皇明萬厯三十七年歲在己酉七月吉日題

右第五區計八行鐫刻陰文

右銅鐘在樂清東塔院上下各六區上層第一第
四兩區鑄成陽文餘數區有明人鐫字茲錄其一
鐘爲泰定年鑄而明代鐫字云捨財置鐘永爲本
院振響益從他寺購來本非東塔院鐘也院在山

巔同治初年粵寇犯樂火寺鐘顛山下觸石穴焉
寇退姦民夜積薪焚之不能燬竊載以舟至城西
沒於水乃爲漁者所獲山下居民周玉峯集衆贖
之而不可然亦不敢竟毀久之其地多疾禱祀者
咸謂神靈不安於是僉議還鐘是時寺未修復權
送東城尼寺又二年始歸於院

王儒志先生遺像碑

永嘉理學儒志王公遺像

篆額

陽春其益良玉其溫扶輿所鍾噩噩渾渾
東山講道學是尊當伊洛之未作承洙泗
之淵源杜淫邪路闢皇極之門儒志一編
闡道之原賢良三策衛道之恒功扶世教

澤裕後昆使天假年安知其不扣聖人之幽

閤也耶 元泰定丙寅夏季月望後三日正

議大夫海南海北肅政廉訪使王都中謹贊

右碑在府學鄉賢祠內高五尺七寸寬三尺三寸
篆額字徑二寸八分贊語七行正書徑七八分不
等前四行行十六字後三行行十七字此碑與名
宦祠謝康樂遺像碑相對一宋刻一元刻而此獨
完善惟篆法甚劣鐫手亦不佳輿作與垣作恒訪
作坊皆誤疑非元時原石也王儒志先生爲永嘉
理學之祖字景山名開祖登皇祐癸巳第不調而
歸從學嘗數百人召試賢良方正時伊洛諸儒未
作景山獨能發明經蘊著有儒志編郡守楊蟠立

儒志坊表之學者咸稱爲儒志先生見萬厯府志
理學傳儒志編有云由孟氏以來道學不明吾欲
述堯舜之道論文武之治杜淫邪之路闢皇極之
門吾畏諸天者也吾何敢已哉卽此贊所本也

孫詒讓案元史王都中傳字元俞福寧州人父積
翁以國信使宣諭日本遇害世祖念其父功授少
中大夫平江路總管府治中秩滿除浙東宣慰副
使江淮泉貨監改郴州路總管遷饒州路總管除
兩浙都轉運鹽使未上擢海北海南道肅政廉訪
使省臣奏如前除擢福建閩海道肅政廉訪使俄
遷福建道宜慰使都元帥又改浙東道廣東道元
統初以正奉大夫行戶部尙書兩淮都轉運鹽使

尋拜河南行省參知政事中道以疾作南歸詔卽
家拜江浙行省參知政事至正元年卒諡清獻又
百官志國初立提刑按察司至元二十八年改曰
肅政廉訪司每道廉訪使二員正三品大德三年
增海北海南道於雷州路置司都中此贊作於泰
定丙寅時尙爲海北海南廉訪使後建廣福天柱
教院碑書於天厓己巳在此後五年則已爲浙東
道宣慰司都元帥矣惟元史百官志及本傳並云
海北海南道肅政廉訪司此贊末繫銜獨作海南
海北與史不同攷元志江南十道別有海北廣東
道廣州路置司則海北乃兩道之大者不宜著海
南之下尙係都中自書斷不至僣到若是是亦非

當時原石之一證也

重建西塔院碑

重建廣福天柱教院記

篆額

重建廣福天柱教院記

水□法明教寺住持宗岳撰

江心□翔興慶禪寺住持如本書

中奉大□浙東道宣慰司都元帥王都中篆
額

樂清西山距縣治二里上有石塔院宋咸平祥符間
額以安仁七寶毛氏士龍□仁先後作記載於邑志
詳□時寢久院圯弗治

皇元海□□清爲佛氏者因□□飭院舊無恒產大

德五年辛丑院之徒迎□功師主之師以法檀度施
者銖□□□乃斬蓬灌底材僦功□□爽垲首剏
殿奉觀音大士□□閣徠以風立普門□之趾識道
路從之因山構堂茗飲□客築梯雲亭以便遊憩自
火宅化淨域者知□歸矣復新作佛殿作三門兩廡
庖湍垣墉四周凡棲衆之具罔不有權輿於□大元
年戊申十二月越十一年而落之恪志□□信響
□道有乎淨土田爲院□□師盡瘁至是九年一
肩也若夫大海橫陳天花羅列井陌鈎連瓴甍櫺
遶文君之丹竈挹子晉之簫臺風帆烟樹萬態畢張
駉客登覽可陶性真雲水交參可攝身意晨香夕燈
其所以拓壽域廣福田俾一厯耳一屬目善念油然

而生□□師之力歟師昆陽人姓施氏先受經於寶勝其徒正信謁余記成功因書其顛末刻諸石云天厯己巳秋九月甲子日記

□林郎温州路樂清縣達魯花赤兼勸農事阿剌帖木立石

右碑在樂清西塔院高七尺八寸寬三尺六寸十八行行三十三字正書徑一寸篆額九字字徑四寸攷縣志西塔院宋咸平五年建祥符七年有七寶祥光現於塔頂紹興改元九月十八夜五色祥光再現二年賜額元改名廣福天柱教院山有天柱峯故以爲名阿剌帖木志作阿剌帖木兒此碑光緒三年訪得錄之訛闕甚多五年寺僧越塵來

出一紙相示補正三十餘字然尙有不可解者

王都中鳳山題字

天厯己巳十一月

一塵不到

元帥王都中書

徐引之按右題字在平陽鳳山寶勝寺後磨崖大書徑二尺餘書法端莊雄壯左右小字徑四寸惟都中二字連書較小都中嘗爲浙江東道宣慰使都元帥元史百官志宣慰司掌軍民之務分道以總郡縣有邊陲軍旅之事則兼元帥府天厯己巳係文宗二年

東甌金石志卷十

東甌金石志卷十一

嘉善 戴咸弼 鼇峯 纂緝

瑞安 孫詒讓 仲容 校補

元二

慶雲寺鐘款

温州路瑞安州月輪山慶雲寺古有鐵鐘鑄於大
宋隆興癸未歲久希聲今易以銅重鑄於大元至
順庚午臘月乙卯日謹誌

鐘銘

雷鼓羣動 鐘振大千

警覺聾聵 戒飭晨昏

月輪永照 靈器高懸

慈雲衍慶 億萬斯年

右上層第一區計八行

比丘雲崖法雨拜撰

右在篆帶閒計一行

住山比丘智堅耆舊比丘道朋志遠了義

師安奉勸本源各捨衣資報答恩有者

宣力幹緣道者法勤法智

幹緣孫道明蘇景賢葉明智

幹緣會首葉彌高鄭餘慶蕭友益楊大苟

葉德元葉小瓚各捨寶鈔助緣

右第二區計六行

剋擇官 蕭 可斌

東嘉南川範金劉任翁造

右在篆帶閒計二行

聞此鐘聲超法界

鐵圍幽暗悉皆明

三塗離苦罷刀輪

一切衆生成正覺

右第三區計四行

祝延

今上皇帝聖壽萬安

右第四區計三行

南無大方廣佛華嚴經

若人欲了知 三世一切佛

應觀法界性 一切惟心造

南無阿瑟吒始帝喃三寶三佛陀

俱胝南但枳他唵闍那縛薩斯

地哩地理娑訶

右第五區計六行

黃德元張自遠鄭亞永伍環孫各捨五千 伏承遠

近檀信捨銅捨鈔捨谷捨炭施主祈保各人庶事吉

祥 陳時志五千

右在篆帶開計三行

檀越信士吳清孫演孫公鉞公珏公鑑公鋌公遂太

初 文瓚已上各捨寶鈔信女張氏大五七娘 捨

鈔一定祈保身位平安者 檀越木君澤捨鈔三定

信女程氏九一娘宋氏新一娘 鄭氏淑一娘各捨
鈔一十千 林思敬捨布一疋 信士木起宗捨鈔
一十千 馮均孫捨鈔薦考千四一朝議往生淨土

右第六區計八行

比丘景福崇當道性等倫德勝陸信安仕安各捨鈔
兩 余宗玘陳文志高良珪各捨鈔兩祈福壽者
任亞臭鈔一十五千馬敬一娘七千五百文張元四
娘布一疋 黃慶五娘捨酒一扛任小翁育一疋

右在篆帶開計四行

陳道忠 陳景祥 蔡慶三娘 王一富 葉得祥
林元鼎 宋振孫 福孫 威孫 愛孫 已上
各捨鈔一十千 黃顯祖捨布一疋育半疋 青林

李勝祖妻高萬一娘弟永祖共捨鈔一定酒一扛
陳萬六娘 姚文六娘 錢貞四娘 李榮一娘
共捨鈔二十五貫 李似孫妻吳禱四娘共捨十千

右下層第一區計十行

李慧孫妻陳賢二娘鈔五千 包法安鄭元一娘弟
僧禱陳元三娘共捨半定 陳榮立胡萬二娘李端
一娘捨自布二疋 徐亞吉文小得各捨自一疋

右在篆帶闕計四行

金普達七兩五百文 林亞益 陳貴一娘 李清
甫 李仁甫 黃盛一娘 陳元二娘 周七秀
各捨五貫 林端三娘 吳庚一娘 范盛二娘
范寄奴 郭亞勤 共一十二千五百文 葉敬老

繆敏弟 鄭慶六娘 范慶七娘 章端七娘
共捨一十二千五百文及各人捨鈔貳千五百文所
保各人增延福壽者

右第二區計十行

曹正一娘 陳文一娘各鈔七千五百文 當寺比
上思聞捨鈔一十一貫薦所松房先師翁月庭知客
聞此鐘聲增崇品位 台甯范松澗鈔五千

右在篆帶閒計四行

陳順祖 王文僧 丁元善 楊創榮 王清三娘
徐坦翁 金自達 黃元德 陳貴二娘 李福
壽 李良友 各鈔五千 宋宜詵 林德雙 葉
德明 徐道順 陳端 王宜各捨鈔一十千 高

環祖鈔七千五百文 本州市心張善行陳元三娘
各捨一定 陳正心 曹壽孫 賴思賢 陳慶弟
各捨鈔五千

右第三區計十行

比上克昌捨布一疋 趙仕弟思賢鈔一十千祈保
男孫子綬 奉福寺比上尼了緣智印祥道各捨寶
鈔 高得甫捨布一疋

右在篆帶閒計四行

劉宏卿 陳所村 陳梅村 各捨鈔一十千 陳
且隱 陳溪雲 陳玄隱 陳桔隱 陳永成 繆
慶三娘 王正一娘 王正二娘 趙福二娘 陳
清泉 陳如溪 各捨鈔五千

右第四區計八行

劉似保捨白麻五把 朱崇三娘捨鈔一十五千
林萬六娘捨鈔一十五千錦襖一條 宋文一娘捨
鈔一十五千

右在篆帶間計四行

王端一娘 潘端二娘 林千三娘 林慶三娘
各捨麻布一疋 陳賢三娘 馮貴一娘 蕭有德
林驚奴 張十七娘 葉敬翁 張思恭 金益
老 徐萬六娘 何得順 葉崇禮 金萬九娘
葉思泉 葉小苟 鄭端七娘 馬住第 朱思轉
陳采芹 林宗三娘 孫亞轉 黃德妹 鄭得
運 已上各捨鈔五千

右第五區計十行

金賢一娘 賢二娘 黃靖二娘共七千五百 包
福三娘捨鈔三千 鄭文畎 鄭圓老 陸義甫
各捨麻布一疋

右在篆帶閒計四行

黃復德 黃希滿 丁小宗 王正一娘 金慶一
娘 王初弟 各捨鈔一十貫 金端一娘 林貴
三娘 各捨鈔八千 鄭弟兄 鈔一十五千酒一
扛 林大二娘 葉明三娘 鈔一十五千 鄭元
一娘 鄭慶十娘 陳順妹 馬崇三娘 陳振龍
已上各捨有一疋吉布五丈鈔五千銅七斤 林
思堅 金十一娘 各鈔七兩五百

右第六區計十行

石井林元四娘男婦金寧一娘應文三娘金青二娘
共捨鈔二十千酒一扛 黃友得妻馮貴二娘捨鈔
十五千 黃慶端捨酒一扛鈔五千

右在篆帶閒計四行

右銅鐘在瑞安仙巖聖壽禪寺高七尺三寸七分
下口圍一丈四尺四寸六分文云温州路瑞安州
月輪山慶雲寺古有鐵鐘月輪山去城西五十餘
里屬安仁鄉仙巖去城東三十五里屬崇泰鄉不
知鐘何時歸入聖壽寺也慶雲寺無攷瑞安宋度
宗朝屬瑞安府元改屬温州路元貞元年以戶口
數多升爲州助緣者有育布白麻錦袱等非範金

所需或同時別有所製遂並登之耳捨酒者五扛
疑助工匠之食金石萃編大馬村經幢有助緣鹽
醋之類義亦同此

柳貫重建永嘉縣學碑

永嘉縣新學記

篆額

永嘉縣新學記 文林郎前江西等處儒學提舉東
陽 柳貫撰并書篆

温州治永嘉今永嘉爲上縣而温州爲大府矣府有
學縣亦有學猶黨庠遂序之異名而同以化民成俗
爲義也永嘉舊學在府城東陬華蓋山下延祐甲寅
燬明年令何君玉作禮殿三年令王君貢作門廡講
堂基構粗立而暨茲塗堊未底厥功越十四年爲至

順辛未 趙君塔納字敬叔繼至諗於衆曰縣實有
民庶而能教則由教以之道而學其器也 聖 師
臨之吾敢不飭於是擇日投圖簡材比物士口其贏
工售其巧凡新作絃誦之齋十六楹間而自殿及堂
門闕窗瑱之當綵飾者庭霏陞庀之當加甃者咸考
度以致其工像繪合章尊俎應式宿有次舍限有垣
墉族庖計廩位置左右觸目具美不陋不若旣釋奠
告成君復諗曰凡茲學功有 賢府侯以爲之管籥
有縣長貳以爲之鐘呂故吾得上下受畫以敦事於
其間今庠舍苟完遊歌之徒亦稍集矣然則學豈徒
器而已乎乃使來請文表示學者蓋古者學必有

先聖 先師之祀自始入學而皮弁祭菜學入官而

宵雅肄三以夫人性本善而所以磨揉遷革卒要其成者猶有待於禮銘樂治之功則示之以敬道而直之以爲治固必有其人焉耳禮五百家之黨萬二千五百家之遂有民斯有學在黨曰庠有黨正以莅教治在遂曰序有遂大夫以明有功正歲之屬民讀法所讀者三物之法也三歲之帥吏與能所興者三物之能也屬之帥之其人則正與大夫其事則學與教焉而已政何適而非教教何適而非道士生斯時見大節踐大義出聞詩禮之訓人謹仁讓之習樂其事勸其功人人有尊君親上之心故曰官先事士先志夫已仕之事卽未仕之志亦各有其職焉惟不以政自爲政教自爲教則興學以範民非無道器之所寓

舍器而論道是謂誣道吾不謂之道矣趙君學古知
方篤行自修其爲永嘉甫朞月耳民旣樂生士亦趣
業君不以爲泰而獨汲汲焉惟學之爲務又欲徵吾
言以申儆之然則世之尙觀美侈名譽者以爲儒者
例不知政何其謬耶泮宮旣作而魯侯之德以明鄉
校不毀而子產之仁益信謂吾稔於趙君而溢於辭
豈知言哉是役也縣教諭信安沈元鼎實終始宣勞
法宜牽聯得書書之所以嘉善而勸來壹是春秋之
義也明年至順三年其歲壬申春二月甲子謹製
府提調官通議大夫温州路總管兼管內勸農事伯
答爾

承務郎永嘉縣達魯花赤兼勸農事脫阿

承務郎永嘉縣尹兼勸農事趙塔納

從仕郎永嘉縣丞曹洪 將仕郎永嘉縣主簿梁玉

永嘉縣尉季瑄 永嘉縣儒學教諭沈元鼎

王申之刊

右碑在永嘉縣學大成門外高七尺寬三尺九寸五分二十四行行三十八字正書徑一寸筆意野逸可觀篆額字徑五寸五分伯答爾府志作伯達兒趙塔納作趙搭納按浦江人物志趙大納一名良勝遷永嘉令有惠政柳貫集作趙搭納塔搭大音相近元人姓氏多可假借也季瑄流泉人其子卽大納塔府志瑄从玉从管誤柳貫字道傳婺州浦江人元史附黃潛傳少有異質博極羣書仕至

翰林待制與黃潛虞集揭傒斯齊名人號儒林四傑學煥於延祐甲寅與府庠同時被災越十有七年始落成經營之不易如此

孫詒讓案此記亦見柳待制文集以校石本如三年令王君貞作門廡講堂三年上集有又字趙君塔納上集有令字簡材比物集比作庀士口其蘇缺又集作薦篤行自修集行作於此外悉與石本同趙塔納萬厓府志治行傳有傳惟書其名作搭納或陳旅安雅堂集陳孝子宗墓誌正作塔納與此記合宋濂文憲集有元朝列大夫知婺州路總管府事趙侯神道碑云侯名長勝後更名大訥字敬叔其先有屬籍於宋少閩敏通蒙古字學遂以

譯曹起家累遷温州路永嘉縣尹除溫台等處海
運千戶据碑則塔納本宋宗室在宋名良勝入元
以譯曹得官改用蒙古語爲名譯語無定音故塔
或作搭又作大納或作訥又作蒯也

廣化寺石夾題字

至順三年壬申歲六月庚申當山□□捐資建立
右在永嘉大廣化寺石夾上

王澄原墓誌

王氏五季時緜閩徙溫之安固蟠浦世業儒惟我高
曾而下文學源委積久益著先子諱澄原字處厚生
於清祐戊申八月十四日曾大父諱世良大父諱奕
以道德文學伏一世西山鶴山諸老咸所推重著書

霞碧山中學者宗之曰霞碧先生父諱庭鎬嗜書如飴手澤萬卷先子承祖考業日濡耳染莫非典訓積書遍讀工於古文隱居樂觀自號靚佳居士與從子厯孫爲竹林遊每相與考訂古今論述家學浹日竟夕亶亶忘倦晚歲以家事付冢子福孫將逸其老不幸於至治改元二月十四日卒年七十有四嗚呼痛哉娶鄭氏卒先十年男二福孫順孫福孫後先子六載亡孫男三子厚子文子韶孫女四曾孫男一女三先子素樂霞碧之原曰吾祖隱於斯吾沒甯於斯遂卜宅兆旣窆先妣順孫企先兄之孤子厚忍死以至順癸酉十二月庚申朔奉柩合葬日薄未克求銘姑誌歲月焉孤哀子順孫泣血謹誌

本齋王都中填諱

邵聖甫樵勒

右碑舊藏平陽蘇氏大雅山房今歸瑞安李肇元家此係裝本不計高廣行楷書徑八分癸酉爲順帝元統元年改續通鑑文宗崩於至順三年壬申十二月至癸酉六月順帝卽位十月詔改至順四年爲元統元年碑立於改元之後二月蓋猶未及知也

孫詒讓案王澄原舊府縣志無攷其大父奕字子陵見萬厯府志文學傳稱其自幼篤學靡不窮究杜門著書不求聞達清祐間有旨索所著趙守汝鴈爲繕本進且薦之不應命卒此誌謂其以道德

文學伏一世西山鶴山諸老咸所推重則子陵又
見知於真文忠魏文靖諸公足與郡志互證末題
本齋王都中填諱都中自號本齋亦見元史本傳
此碑立於元統元年時都中方爲廣東道宣慰都
元帥也

李燾墓誌

季弟燾字子載姓李氏世居永嘉蒼墩曾祖諱義和
妣包氏祖諱夢召妣張氏考諱當孫妣陳氏□□氏
子男思婦鄭氏女孫曾□□於至元甲申十一月丁
酉卒□泰定丙寅十月丙子以元統乙亥閏十二月
庚寅葬于里日溪障隴之原兄默□□壙默之長子
怡從葬焉怡字士悅生于大德丁未三月辛巳卒于

元統甲戌七月壬辰娶戴氏姪從姑也子男二伯已仲升於戲維四兄弟季特出類子姓凡十怡長安梓謂宜克家年胡不遂東池有蓮載擢其瑞喪此家寶祥寶爲異式藏於斯百世永裕

右李靈壙誌在永嘉相溪李氏墓石高一尺七寸十六行行十二字隸書徑一寸許李夢召見前靈山院鐘款元統乙亥爲順帝三年

孫詒讓案靈亦蒼墩李氏與宋巽巖李文簡公同姓名葉水心集李仲舉墓誌載仲舉三孫義方義問義崇据此誌靈曾祖名義和亦以義字聯名可以攷其行輩誌爲靈兄然所作摺誌則然之子怡亦從葬故兼詳怡之生卒年月及妻子姓名誌末

爲韻語亦二人同舉蓋從父子同誌又碑版之辨例也

蒼坡李氏墓碑

附

蒼坡

李氏

十四

世墓

開十六府君

此孺人陳氏

此墓在李燾墓左近前八字篆書徑四寸後十字隸書徑二寸二體皆可觀惜無紀年次於燾誌之後

大廣化寺石路紀年

至元三年丁丑六月日

右刻在永嘉大廣化寺三門外石路之側三年丁丑乃順帝後至元也

釋廷俊仙巖修塔碑

重修仙巖塔記

篆額

重修仙巖塔記

番易釋廷俊撰

承事郎温州路同知瑞安州事前進士朱文選篆額
仙巖擅安固之勝寺用嚮屹大浮圖實侈一方瞻敬
而部勒山川氣象唐大中泐厥始宋宣和墮窳燂日
鏤霜蝕亭亭一土聚凡二百餘者熟視莫克結

延祐五年長老寂室致蘊未至之三日霄漢夜飛燈
懸塔杪煜煜里閭爭指目爲佳兆旣至喟曰是塔弗
嚴祈氓敬口弛矧興葺實所任然寺蕪已久圖宜惟
先姑置徐議其可至順元祀春諗於衆曰寺幸就緒
塔興斯其時余將罄羨儲極劬勩先之爾衆尙克相
我事議乃合耆宿智期子嘉宗爵慨紆帑宣力以佐
徒屬或研金刺血濡毫書妙法華哀鏹濟費邑人安
斂兒戴宗善涂文益欸門首有捨捐惟是施金鑿至
伎巧駿奔鳩材範金貨珽飾像經始夏四月越三稔
成爲費若干緡爲級七爲高三十丈羣衆赫奕蕩心
駭口見見聞聞善種何莫由茲以萌功利其可旣昔
覺雄氏覩古朽塔於荆棘中岌岌若土堆泣然涕泗

下解所衣覆之俄頃光明赫然出塔上時人天百萬
與瞻仰者咸證果衆啟厥旨覺雄氏語曰是塔七寶
所成諸如來神力持之寧有壞相以衆生業果故隱
耳叮古朽塔不遭覺雄氏終莫發其隱愚亦謂仙巖
之所成就者微師疇克爾耶是庸記

至元四年戊寅結制日立石

許叔永鐫

右在瑞安仙巖寺山門右高七尺五寸八分寬三
尺九寸一十七行行三十二字正書徑一寸五分
篆額字徑五寸月令廣義釋氏以四月十五日佛
成道之辰是日命衆僧念經結戒後人謂之結夏
謂戒五濁暑溼之氣也釋苑宗規四月十五僧家
結夏天下僧尼此日就禪刹挂搭謂之結制夏乃

長養之節在外行恐傷草木蟲類故九十日安居
至七月十五日散去爲解夏又調解制四年戊寅
爲順帝後至元也

孫詒讓案右至元四年重修仙巖塔記爲釋廷俊
所撰朱文憲篆額文憲字原道莆田人至順壬申
進士擢同知瑞安州事階承事郎改汀州路總管
府推官調甌寧縣尹除福建宣慰司都事丁內艱
起知瑞安授福建儒學提舉遷同知泉州路總管
府事以嘉議大夫泉州路總管致仕卒朱濂爲作
墓誌見宋文憲集蓋文憲前後兩官瑞安此其前
一次爲同知時其繫銜與墓誌正合仙巖名山古
刹所有古刻自宋磨崖外豐碑巨碣存者以此爲

最古亦可寶也

歸元寺鳥雀臺題字

至正甲申下

元令節歸元

禪寺供僉者

徐引之按右在平陽西城外雅山歸元寺階下有
鳥雀臺高四尺許寬尺許高僧施米於上鳥雀聚
而食之故名字甚蒼古三行行五字正書徑入分
平陽志歸元寺元至元間吳德大建甲申順帝至
正四年去至元末止五年耳

大廣化寺井闌題字

錦巖源泉

至正己丑冬

比丘文偉立

右井在永嘉大廣化寺前四字字徑七寸後二行
字徑一寸均正書

大廣化寺鐘款

當今皇帝萬歲

右上層第一區

聞此鐘聲超法界

鐵圍幽暗悉皆聞

三途離苦罷刀輪

一切衆生成正覺

右第二區

五十都鎮上里鶴坪新安任謝祥衆捨古鐘入寺舊
損無聲今口震房謝毅孫自已捐財命工重造永充
大廣化寺中佛殿受用祈保身躬康泰家眷平安伏
請三寶證明諸天炳鑒至正己丑臘月誌募緣僧文偉
了心

右下層第一第二區

右鐘在永嘉大廣化寺鐘高四尺一寸銑厚一寸
下圍七尺八寸凡二層層各四區

曾堅等鳳山題名

至正十年翰林修

撰曾堅子白隱此

太子文學陳建叔

達監察御史孔汭

世川教授顧元龍

仲明進士陳高子

上來八月丙戌記

僧宗慧善住本光書集

十行泐石

右在平陽鳳山陳高字子上平陽人擢至正十四
年進士授慶元錄事再授慈溪尹方明善陷平陽
棄妻子往來閩浙閒至正二十六年浮海過山東
謁壙廊帖木兒於懷慶欲官之不可未幾卒事跡
詳揭泐所撰墓誌銘

孫詒讓案曾堅臨安人吳文正公澄門人與陳子

上同登至正甲午進士爲國子助教擢翰林修撰
出爲江西行省郎中入爲國子丞升司業詳定副
使拜監察御史改翰林直學士卒見宋文憲集曾
學士文集序據此刻則堅蓋嘗寓廨平陽故宋序
述其所著詩文分爲九稟其三曰青華稟青華山
在平陽縣西南與鳳山相連故此題有隱此之語
子上不繫舟漁集新歲憶曾子白詩亦有青華爲
客久白晝著書勤之句又有過青華山訪曾子白
不值留宿僧舍詩此題卽寺僧所刻也又子上集
平陽州儒學增田記云至正十九年天台陳鑑翁
來爲教授慨然以興起學校爲已任越明年春南
臺監察御史易普刺金孔汭行部閩廣取道於溫

三月之吉適臨是州又瑞榴記云至正二十二年
林君伯恭之園榴生五實並蒂七月伯恭以客燕
在座者有監察御史孔訥世川是孔訥以至正二
十年春至溫後二年七月猶在郡也顧元龍平陽
人宋錢塘主簿岡五世孫見宋文憲集題顧主簿
上蕭侍郎書後元龍至正十六年爲常熟教授見
盧熊蘇州府志故此題亦稱教授惟陳建無攷
咸弼又案此刻係徐淞樵錄示未見拓本据仲容
攷證各條曾堅與陳子上同登至正十四年進士
後擢翰林修撰孔訥於至正二十年至溫顧元龍
至正十六年爲常熟教授今此刻在至正十年無
論堅與子上未登進士不得豫書官階卽孔訥亦

未至平陽顧元龍亦未爲教授覈其繫銜及進士
云云俱與諸人入官年代先後舛互疑十年上文
有脫誤當作二十年或廿年也又陳建繫銜爲太
子文學疑卽下譙樓記書篆之陳達達曾爲太子
文學兄下譙樓記跋與此刻合建字或係淞樵誤
釋惟一字叔達一字仲達小有異同未知是一人
否也

橫井巷大井題字

天 至正庚寅

宿 臘月吉日

信士徐順道重建

右井在永嘉東門內華蓋山下橫井巷井口六方

其面東一方橫列天宿二字徑四寸下八字兩行
徑二寸末一行字又畧小共十七字皆正書至正
庚寅卽順帝十年也

貞隱處士張公墓碣

至正癸巳十有

貞隱處士

張公之墓

二月庚申日立

孫詒讓按右墓碣在瑞安陶山宋湖南提刑張聲
道墓道御鳳樓前數百步處士名無考疑亦張氏
裔孫也癸巳爲至正十三年時方明善正據溫州
處士蓋潛德不曜能自全於亂世者惜無碑志之

文以考其生平事跡也

陳高陳文僑惠澤記

陳君惠澤記

陳君惠澤記

溫之平陽其鄉爲金舟有善士焉曰陳君國英隱居而好義凡遇事有益於人者必奮力勇爲之其惠澤□及甚□至若修水利以濟農民遏寇亂以保鄉井此功尤灼灼明著者也金舟之東北距大海當衆流入海之衝有堰□陰均堰堰長八十丈其傍有水門宋嘉定中林君居雅所作□以捍海而蓄水溉田凡四十萬餘畝歷年久□存□至正初堰及水門皆壞官屢興役修築然皆爲具文且緣擾民不能就緒

背腴化爲斥鹵連歲凶歉父老言口官口以屬君君則
出泉粟爲衆倡運材鳩工先治水門水門已完明年
修堰其經畫勞費倍口水門者四五旣成未固復毀
於潦水君至徬徨悲泣復口營之晝督畚鍤夜補墉
漏竭心瘁力卒復舊規君能任浮屠氏道成俾相其
役成亦不憚奔走故獲成功由是農無失業禾黍歲
登而人免於饑焚十三年口口賊起州之邊境山谷
之民亦相聚爲寇口殘毀州治所過焚掠有惡少謀
欲乘時起亂應之未發衆具詢詢君乃率豪右結集
義民而召致其人諭以禍福口止不動會山寇爲湖
南里人所敗遁去而口江浙行中書省亦命周君宗
道權知州事總兵討賊人心始安當是時微君鄉里

幾不可保方州之新破也里中凡欲訟曲直者悉詣君所君爲處平多得其當咸服去不怨旣鄉之人士僉曰水門及堰非君脩之則吾不食其土而飢死流離久矣姦獷造變非君之力則吾不能保有其老稚居業君之惠澤在吾鄉者可謂至深吾欲貨之以賄則君所不欲吾欲尸而祝之社而稷之則君又不可將圖報於君者無由惟勒之堅石以示厥後其庶幾焉乃相率來言而以文爲請夫王者之政在乎生養安全斯民而已興利以生養之止亂以安全之豈有有補於王政而爲惠澤之大者乎然此乃長民者所當行而其行之也最易今君以布衣獨能行之斯可尙也已推其用心蓋出於不忍坐視鄉人之飢困亂

凶初非沽名要譽而爲是也烏乎安得天下之人皆有是心哉書其事以爲勸庶乎聞風而興起不無其人耳然則德君而不能忘者衆人之情也書其事以勸夫人者予之志也於是乎書君名文僞國英其字自號蒼雪道人至正十五年秋七月庚子 賜同進士出身將仕郎慶元錄事陳高記 賜進士出身從仕郎處州路慶元縣尹兼勸農公事孔陽書 敦武校尉温州路平陽州判官張君錫篆蓋

里人戴茂

鄭環

林□□

葉兼善

金□

王□道

陳□天

鄭存誠

項□□

林□琥

林桺

陳宗祖

鄭□中

胡□□

□□

陳誠陳

以上第一行

彭仁翁 陳珏 王文埜 陳□ 王珠□

戴文□ □道□ 吳仲舉 林□洪 謝□

□ 林振祖 應景因 魏□ 黃慶□ □

□ 黃祐 等立石 以上第二行

□□ □惟□ 謝□□ 鄭天璫 黃□□

林文□ 黃□ 彭文煥 鄭□□ 黃景

□ 彭伯□ 謝□ 楊若勝 □□ 彭□

□ 等□立石 以上第三行

方外 溫州天寧禪寺住持□□□ □□寺住

持僧 □□ 耆舊 德瑩 祖□ 德普 □

□ 以上第四行

右陳君惠澤記篆額三行六字徑二寸許記文十

九行行四十四字正書徑五分許後附里人方外
耆舊等姓名四行字大小多少並不等記文陳高
撰孔陽書張君錫篆蓋高已見前曾堅題名石在
平陽金舟鄉

孫詒讓案記文爲陳子上所作文格峻潔埽非假
託然今所傳不繫舟漁集未收蓋明人編刻時不
無遺佚也記述平陽義士陳文儒築堰掃寇事甚
悉舊府縣志人物門並無文儒傳惟康熙平陽志
元薦舉題名有陳文俊字國英陳營人官至元帥
府僉事據此記知俊當作儒其自號蒼雪道人亦
僅見於此足補地志之疏略不繫舟集別有美陳
國英脩堰詩序云平陽州之南爲長港港之南有

田萬餘頃嘉定中鄉人林君居雅始爲堰八十丈於津流入海之衝至正三年堰壞越五年岳侯伯仁來知是州將召民致其役州人陳君國英素好義聞之奮然以爲已任散財募士戮力營之逾時堰成而尋復壞君百計作治竟獲儲功舊規克復云云亦與此記所述略同林景熙霽山集陰均斗門記亦云平陽大斗門入陰均爲大嘉泰汪令季良所創也其毀家以相林君居雅也陰均斗門卽此記所云陰均堰旁水門惟此記及本集述林居雅脩堰事並云嘉定中獨林集作嘉泰蓋傳寫之誤万厯府志及康熙平陽志水利門亦載陰均堰林居雅所創而文僞重脩則並未載亦甚疏也記

又述至正十三年寇擾平陽文儒撫定亂民事當
在張希伯金翁瑞等熱掠平陽州治時詳万厯府
志襍志門記又云江浙行中書省命周君宗道權
知州事總兵討賊宗道名嗣德平陽人仕元至江
浙行省參政方明善破平陽執送方國珍不屈入
明卒事蹟詳万厯府志人物傳蘇平仲集嗣德墓
志云至正乙未闕枯之寇蔓延平陽且兩載四境
之內胥爲盜者十六七浙東道宣慰使恩寧普來
鎮溫便宜命公攝行平陽州事倚公討賊卽其事
也孔暘亦平陽人蘇平仲集亦有墓志云登至正
二年進士擢衢州路錄事轉處州路慶元縣尹代
歸十九年中書參政普頌不花內臺治書李國鳳

經略江南承制授温州路同知平陽州事又載方明善取平陽陽不爲用旣入明與陳子上慨然有浮海之志以父老不果明胡仲淵鎮栢以書幣聘堅辭不出蓋亦元季遺老不仕異姓者其風節之高足與子上相媲張君錫涿州人至正末爲平陽判官因家焉方明善破平陽俘君錫沈於江見万厯府志孝友張端傳蘇平仲周嗣德墓志亦載至正辛丑夏遣都事張君錫漕貢則君錫又嘗爲都事蓋以寓公從嗣德守平陽嗣德旣敗君錫并罹其難其不辱於方氏與陳孔兩人同而遇禍則尤酷然則此記之存非徒文僞義俠藉以表章而忠盡遺墨萃於一碑尤足珍矣記後附鎬里人姓名

字特小多剗缺不可辨其人亦大率無攷惟彭仁翁字如山亦金舟鄉人陳子上爲墓志見不繫舟集稱其重然諾負幹濟才不用於世而能以善治其家蓋亦當時善士也

林彬祖重修譙樓碑

重修温州路譙樓記

從仕郎福建行中書省檢校官林彬祖撰
集賢直學士亞中大夫兼

皇太子贊善陳達刺麻實理書并篆額

至正二十有五年浙江行省右丞方公旣新温州之譙樓士民鮑鉉等以狀請彬祖記其事按譙樓建自口宋之淳熙中高六楹左右翼各四楹聯以兩廡東

西百步累甃爲址下通廣達上設更鼓千里耳目攸
屬○延祐中郡守趙鳳儀嘗一繕修更厯四紀風雨
侈剝每憚其役重因循弗理公旣分鎮署郡治顧而
嘆曰是何得不葺然不可勞吾民乃遂出帑金治之
於是工師遴才山澤出藏陸輸水轉遠近畢達陶人
冶師咸○子來梓匠效能出機若神弱變爲強腐化
而堅仆者以植欹者以貞缺折以完梁柱桓桓棟危
聿隆巨細○能因材庀庸新故相贊交致其功屹如
虎踞翼若翬翥周阿峻直中通外飭塗之丹艧輝彩
交燭無異撤其舊而新是作是役之費白金以兩計
者二千有奇諸匠以工計者二萬五千有奇役始癸
卯冬十月至是○功而民不知擾郡屬文武官吏與

其民士環立仰視莫不歎息而頌公之德咸謂公之
報

國也忠故其恤民也勤公之鎮溫也內清山賊外遏
淮寇歲督海艘轉漕於京師每念僭亂未平寐不
安枕口游卒以爲勁兵斥浮費以充軍實禮賢任能
務農通賈武備增修而功實益著矣至正十八年公
以行省都鎮撫來鎮明年擢行樞密院判口又明年
升同僉二十一年進僉書院事公之弟元帥亦陞判
樞佐公鎮口明年拜閩省參政兼僉院鎮禦如故院
判亦進秩同僉二十三年公陞江浙左丞同僉陞僉
院明年進公右丞賜分省印章僉院復陞副樞
朝廷倚任日隆公報效彌至公知邦本在民故勞民

之事惟恐及焉況麗譙政令所出而□□無事治之
□□也人其有寧矣彬祖以己亥冬來是邦凡士民
所狀多親見而知之者又茲役之美宜□以示後來
□□□不文辭乃遂載其事於石公名明善副樞名
文舉是年歲在乙巳正月八日記

榮祿大夫温州路總管府達魯花赤兼
勸農防禦事八十六

□順大夫温州路總管兼勸農防禦□
□□□與侃

士民蔡德明何元葉□□□□□
□張友□□□□朱新福林炳宗立
石

右至正二十五年温州路重修譙樓記攷府志梁
開平初錢氏始築內城周三里十五步通四門內
衛州治外環以水又名子城名勝志云舊州治在
譙樓大街正北是也元時至元十三年廢爲民居
止存譙樓此記云譙樓建自宋之淳熙中而不及
錢氏始不可解又攷郡學初立在華蓋山麓天禧
三年徙故九星宮址卽今學宮是也後又再徙元
祐五年復今所今此碑在郡學戟門外西偏鄉賢
祠內距舊州治里許或舊譙樓廢好事者移碑置
於此耶又宋高宗建炎四年航海至溫以州治爲
行宮譙樓爲朝門及回鑾詔温州行宮仍充州治
卽今之城守營署也淳熙中重建譙樓志無明文

郡志公署門但稱後梁開平時築 本朝順治燬
於火其修建始末畧而不詳非得是碑證之又安
從知之耶碑高一丈一尺餘寬六尺四寸二分計
二十三行行四十一字行末一字陷入土中字徑
二寸士民一行字較小徑一寸二分楷法絕腴潤
缺損止十餘字餘並完善可讀惟碑載陳達刺麻
實理書并篆額而今碑上並無額不知當時原刻
所在或後人移立失之未可定也所稱江浙行省
右丞方公名明善卽方國珍之姪時國珍據溫台
慶元三郡屢撫屢叛至正十八年戊戌遣明善分
據溫州凡十年至丁未與國珍同降於明文中厯
敘官階頗詳蓋方勢日熾朝廷莫能誰何每歲航

米及貨物至燕交通權貴凡宣敕封贈要求無不得亦可見元政之不綱矣林彬祖麗水人至正乙酉進士見處州府志嘗爲永嘉丞進福建行中書省檢校官文特古茂而於方氏多諛詞是殆以身羈屬部迫於威命有不得不然者與末第二行温州路總管兼勸農防禦下剝蝕四字僅存其名曰與侃疑卽鮑與侃攷台州府志鮑與儔黃巖人元温州路總管乾隆郡志雜記方明善出降時其妻鮑氏裂絹爲旗命吏書投拜二字至西門鮑與侃阻之此二人似皆明善妻之兄弟而先後莅温州者也郡志職官俱失載

孫詒讓案此記爲林彬祖所作中紀方明善及其

弟文舉歷官極詳可以補明史方國珍傳之闕時
至正二十五年明善方以江浙行省右丞據温州
而明太祖已下衢處與方氏爲鄰境此記述明善
鎮溫之功曰內清山賊外遏淮寇淮寇卽庠臨濠
也彬祖字彥文見陳子上不繫舟漁集瑞榴記此
記自云以己亥冬來是邦己亥爲至正十九年其
爲永嘉丞當卽方氏所授官瑞榴記作於至正二
十一年稱其官爲江浙省都事此碑在其後四年
則又遷福建行省檢校矣蓋明善由江浙僉院拜
福建參政彬祖亦隨之遷擢始終未嘗去方氏也
篆蓋之陳達刺麻實理疑卽陳達達永嘉人宋丞
相宜中之從孫字元達學書於平章康里巉巉待

制仕本書名與康里公上下至正壬辰擢端本堂
司經轉正字又遷文學以劾禿魯帖木兒辭官歸
永嘉以徵事郎同僉太常禮儀院召不拜又召集
賢殿學士亞中大夫兼太子贊善最後召以翰林
侍講資德大夫知制誥同脩國史同知經筵事並
不赴見蘇伯衡平仲集所爲墓表此碑繫銜亦云
集賢直學士亞中大夫兼太子贊善與墓表適合
蓋陳本名達刺麻實理者蒙古語省從漢文則稱
陳達元時漢人以國語爲名者往往別有漢文之
名猶前趙搭納亦作趙大訥是也

普濟寺鐘款

口延

聖壽萬安

至正二十五年

右上層第一區計三行

□齊主簿

孫杞

□吏

黃伯祥

照磨 杜孟高

浙東道都元帥府

經歷 王錫

右第二區計五行

伯仁

右第三區存二字

□□鐘聲超法界

□ 圓幽暗悉皆明

□ 遠離苦罷刀輪

一切衆生成證覺

右第四區計四行

僧衆思□思本思能

□□

智□

幹 緣者舊淨嚴

住山

淨莊

右第五區計四行

伏承

□□施主各捨財物助造

福有所歸者

右第六區計三行

右鐵鐘在永嘉四十六都壺山麓普濟寺已廢今
移建巽澤里以名普安寺惟此鐘猶存久陷土中
字多破損孫生邦僑摹其文來高六尺七寸上圍
一丈餘腰圍一丈二尺四寸下圍一丈四尺三寸
橫界三層每層分六區中層字跡零落下層不可
辨

謝瑪鶴陽題字

蘭玉臺

至正口巳年謝瑪書

右題字在永嘉鶴陽三字篆書

東甌金石志卷十一